

Xujun xi kits'ínkjihí nda postru Pablo xuta ninku Efeso

B'i ts'ín kikjaniñaha Pablo xuta ninku xi tjin nanki Efeso

1 An Pablo, an xi kama nku nda postruh^a Jesucristo at'aha Ntiana b'a ts'ín kama mjehe. Tifaniñanuu jun xuta Efeso xi kikj'áts'enuu Ntiana, jun xi s'ejinnuu Cristo Jesu.

²Kas'enuu kjuanda ko kjuajyu xi tsjána Ntia Na'miná ko Nda Ntiana Jesucristo.

B'i ts'ín tsakúya Pablo kjuandaha Ntiana

³Kan'etsjoho Ntiana xi Ntiah ko Na'mihí Nda Ntiana Jesucristo. Kui xi kits'ín nga ajihín Cristo kisakúná ngayje t'íkjá ni nda xi nibáha ndjiojmi ján, ni xi tsjána Espirituhu. ⁴Cristo kits'ínchjén nga j'ájinná kintehe ni nga kits'ínnda asuntee tu xi kjuáts'e'hená ko tu xi najmi s'e'hená jé nginkun. Tjoho Ntiana ñá. ⁵Kui nga y'énda títjuhun nga Jesucristo ts'ínchjéhen tu xi ntíhí tsichu mahaná. Tsitjusun xi nkú ts'ín kama tsjoho ko kama mjehe. ⁶Kui nga kan'etsjoho ra Ntiana xi bakúchji kjuanda chánkaha, kjuanda xi sakújinná Ntíhí xi tu xí tjohó ra.

⁷Kisaténdzjo jníhí Ntíu. B'a ts'ín kis'echjintjaihi jéná ko kin'endyjat'aná ngatitsunná. Kama xi nkú tjin bichú kjuachánkaha kjuandaha Ntiana. ⁸Kui kjuandoo xi tu ni xí kitsjáháná tu xi s'e'hená ngayje t'íkjá kjuankjintak'un ko tu xi kamankjihinná ni xi ts'e. ⁹Y'éjña chjiná ni xi kama mjehe nga ts'ín, xi y'éjña 'ma nistjin nk'ie. Kama tsjoho nga y'énda títjun ni xi ts'ín Cristo. ¹⁰Y'énda nga nkuhú kuichúk'iekú ajihín Cristo ngayjee ni xi tsichuba ndjiojmi ján ko asuntee. B'a kama nk'ie nga ja kuichú chuba. Ts'íntjusun ni xi ja y'énda.

¹¹Xi nkú ts'ín y'énda títjun Ntiana, b'a ts'ín kits'ínchjén Cristo tu xi j'ájihinni jin xi ntje judio tjeheenni ko kitsjáni ni xi tsjáha ntíhí. B'a kits'ín at'aha Ntiana ts'íntjusun ngayjee ni xi b'énda. ¹²Ko jin

^a 1:1 “Xi kis'exá” tshu ra “nda postru” ko a ra “já postru”.

kichuyáhi ni nda xi sakújinni Cristo. Jín tjun b'a kin'ei. Kui nga tǐn'etsjoho ra Ntǐaná xi tǐhǐn kjuachánka.

¹³Jun bi kinu'yó ko kis'ejinnuu én xi naxu tǐn. Kui xi én nda tsuhu Jesucristo xi kits'ínk'ankinuu. Ko Cristo kits'ín nga kin'ekjóhoon Espirituhu Ntǐaná, Espiritu xi kitsúya tǐtjun nga tsjá. B'a ts'ín kis'ejña chjhi nga Ntǐaná ts'enuu. ¹⁴At'aha tsjá tǐtjun Espirituhu tu xi chaha nga n'ekjǎhǐn ni xi tsjáha ntǐhi nk'ie nga kama ndaíyjehe xuta xi ja kis'echjǐntjai. Kui nga kan'etsjoho ra Ntǐaná xi tǐhǐn kjuachánka.

B'ǐ ts'ín kinchjantjai Pablo xuta ninku nanki Efeso

¹⁵Kui b'a maha, nkúhu nga kint'e nga s'ejinnuu Nda Ntǐaná Jesu ko nga tjonuu ngayjee xuta xi ts'e Ntǐaná, ¹⁶najmi tǐts'ínkj'áíya nga nchjantjǎínuu nk'ie nga nchjaka Ntǐaná ko tsjaha máb'achjǐhi nga nda tǐmat'on. ¹⁷Tǐbankihǐ xi Ntǐaha Nda Ntǐaná Jesucristo, Na'mi xi tǐhǐn kjuachánka, nga Espirituhu katsjǎnnuu kjuankjintak'un ko k'uéjña chjinuu ni xi ts'e, tu xi kamankjihinnuu nkú tǐhǐn ra ngat'a ts'e Ntǐaná.

¹⁸Tǐbankihǐ nga kakjex'ájin kjuankjink'unnuu tu xi chahanu ni xi tǐkuyáha xuta xi Ntǐaná j'ájihǐn ko tu xi chahanu xi nkú ts'ín chánka ni xi ts'ínkjǎhǐn xuta ts'e. ¹⁹Mjena nga choo xi nkú ts'ín chánka ts'ati nga'yúhǐn Ntǐaná, nga'yún xi basinkoná ñá xi s'ejinná éhen. Kui nga'yún xu'bo bakúchji ni xi ts'ín Ntǐaná. ²⁰Kui xi kits'ínxǎjihǐn Cristo nk'ie nga Ntǐaná kits'ínkj'áíyaha ngabayoo ko kits'ínk'íejǎnat'aha Ntǐaná nk'a ján, yo má batéxuma.

²¹Kitsjáha ante xi 'yún nk'a ajihǐn ngayjee xi batéxuma asuntee ko xi tǐhǐn xá, xi yankjún, xi nk'a tjen ko xi tǐhǐn tu mí xáhá ni xi yankjún. Najmi tu nku nǐstjin xi kich'aá nd'ái b'a ts'ín nk'a tjen, ko ní nǐstjin xi kj'uaí askahan. ²²Ngayjee ni xi tǐn aya ntsja Cristo y'éya Ntǐaná ko y'éjña tǐtjun ya Cristo nga kuatéxumaha ngayjee ni xi tǐn ngandaha xuta ninku. ²³At'aha xuta ninku, kui xi yjonintehe Cristo ko Cristo xi ts'ín nga kama ndjuú tu mí nihǐ ni. Tsa ni xi najmi tǐhǐn xuta ninku, najmi ma ndjuú Cristo kai.

B'ǐ ts'ín tsakúya Pablo nk'ie nga n'ek'ankiná tu ngat'aha ni xi kits'ín Cristo

2 Jun bi tu ngat'aha ngatitsunnuu ko jénuu xutak'ien kamo. ²Nk'ie tǐntsubajiun jénuu xi nkú ts'ín tǐjñaha xuta asuntee xu'bǐ ko xi nkú ts'ín mjehe ndaninda k'aku xi tǐhǐn nga'yún ajihǐn séen. Kui xi tǐts'ínxǎjihǐn nd'ái xuta xi najmi nt'é'éhen Ntǐaná.

³Ngatenteé b'a ta n'e tǐntsubáa nǐstjin nk'ie xi nkú ts'ín kinchjaha animaná asuntee. Kin'eé ni xi kama mjehe animá ngatitsunná ko ni xi tǐnjǐn kjuankjink'unná. Xi nkú k'aán nk'ie, ñá tsuhuná kjuakjahan Ntǐaná xi nkúhu xuta xingisoo. ⁴Tunga tu ni xí ma nǐmqhá ra

Ntĩaná xuta, kui nga 'yún kits'íntjohoná. ⁵Kui kjuaha kits'ínk'íéntu tĩk'unqohoná Cristo nk'ie nga ja tsayahaá ngatitsunná. Ngat'aha kjuandaha tu tĩts'ínk'ankihĩnuu Ntĩaná.

⁶Ntĩaná ta ñja kits'ínk'áiyakoná Cristo ngabaya xi tintsujajían kai ko kits'ínk'íéntukoná Cristo ndjiojmi ján. ⁷B'a kits'ín tu xi nĩstjin xi nibáha kuakúchjhi xi nkú ts'ín chánka tĩña kjuandaha, kui xi tu xĩ ndahá, at'aha nda tsasená ngat'aha ni xi kits'ín Cristo Jesu. ⁸Ngat'aha kjuandaha Ntĩaná ts'ankihinu at'aha kis'ejinnuu. Ntĩá níná tu kits'ínk'ankihĩnuu. Najmi jun manuu n'o ni xu'bi. ⁹Najmi ngat'aha ni nda xi kin'eé ts'ankihíná, tsa tu xi b'a ts'ín tĩn xi nk'a k'uasjehe yjoho. ¹⁰Ntĩaná kits'ínndaná. Y'éyaná xi nkúhu Cristo nga kits'ínndaná tu xi n'ehená ni xi nda xi y'énda tĩtjun ko tu xi kuĩntsubajihinná ni xi ndoo.

B'ĩ ts'ín tsakúya Pabló nk'ie nga Cristo nkuhú ntje kits'ín ma xuta judio ko xi najmi judio

¹¹Kui b'a maha, jun xi najmi ntje judio kich'o nga kitsiun, n'ekj'áítsjehennu xi nkú n'e tintsujoo nĩstjin nk'ie. Xuta xi najmi kin'ehe ni circuncision kitsúnuu xuta xi ntje judio tjeheh ra, at'aha kui xi ts'ĩhn yjonintehe ni circuncision. ¹²N'ekj'áítsjon nga kui nĩstjiun tintsujá t'axĩhuun Cristo ko nga najmi ntjehe xuta Israel jun. Najmi kama ts'ajun ni xi y'éndako tĩtjun Ntĩaná xuta xi ts'e, ni xi kitsúya tĩtjuhun nga tsjáha. Ndaha nku ni xi tsjáha Ntĩaná xuta xi ts'e najmi tĩchuyóhoo nga sakúnuu kai. Chujá tintsujanú asuntee nga najmi yo Ntĩaná. ¹³Kjin tintsujoo nĩstjin nk'ie, tunga nd'ai nkuhú ja kamakoo Cristo Jesu ko ja tintsujá tiño tu ngat'aha jnĩ xi tsaténdzjo Cristo.

¹⁴Ngat'aha Cristo tĩhinná kjuajyu. Kui xi nkuhú ntje kits'ín ma xi ntje judio tjeheh ra ko xi najmi ntje judio tjeheh ra. Kikjexuba xjó xi y'échjaha xuta nk'ie tu xi nkuhú kamaha. Kikjexín ni xi ngji kontraha ra xinkjín xuta. Kitsjá yjonintehe ¹⁵tu xi y'éjña t'axĩhin kjuatéxuma xi kin'ekjas'eheh Moise xi nkjin ni tĩt'aha. B'a ts'ín nkuhú ntje tsetse kits'ín maha nga joo ko nkuhú kits'ín mako yjoho. Kits'ín nga tsichut'áha xinkjín nga nkúnkú. ¹⁶K'ient'á kruu tu xi nkuhú ntje ts'ín maha nga joo ko nga kuĩnchjako nda ngáha Ntĩaná. B'a ts'ín kikjexĩhin ni xi ngji kontraha ra xinkjín xuta.

¹⁷Cristo j'ai tsjá én nda tsu, kui xi y'a kjuajyu. B'a ts'ín kisakúhunu kjuajyu jun xi kjin tintsujoo Ntĩaná nĩstjin nk'ie ko ta kisakúhu kjuajyu xi tiña tĩntu. ¹⁸Ngat'aha Cristo xi ntje judio tjeheh ra ko xi najmi ntje judio tjeheh ra ma bichút'aha Ntĩaná nd'ai. Nkuhú Espirituhu Ntĩaná xi ts'ín nga bichút'ahaá.

¹⁹Kui b'a maha, najmi ta xuta kj'áĩhinu ko ta ndaha xuta xi tĩmasún. Ja ní tsichumo ko jun xuta xi ts'e Ntĩaná ko nkuhú ja

makoo xuta xi tjíntunkí nk'íéhen Ntíaná. ²⁰Jun xi nkú joyaha nku ni'ya xi tímanda, xi já postru ko já profeta kik'atuts'ihin. Tunga Jesucristohó kitsjá xáha nga b'a incha ts'íin. ²¹Cristo be xi nkú ts'ín ngjuai ni'yoo. Nk'ie nga kama ndjuú ni'yoo, nku ninku xi tsje kamaha Ntíaná. ²²Jun xi y'ahanuu Cristo bichúmo ninku xi má nga tǎjǎya Espirituhu Ntíaná.

B'ǐ ts'ín kitsúya Pablo xá xi kik'ǎihi

3 An Pablo ngat'aha Cristo Jesu kjíiya'yúhunna. B'a tímat'an tu ngat'aha ngandanuu jun xi najmi ntje judio tǎhennuu. ²Yo nga kik'ǎina nga k'uenijmínuu kjuandaha Ntíaná. ³Tsakúchjina ni xi y'éjǎ 'ma nǐstjin nk'ie, xi nkú nga ja ta kuak'iet'ánuu. ⁴Nk'ie nga n'eyo xujuin, choo nga be sisian ni xi kis'ejǎ 'ma ngat'a ts'e Cristo. ⁵Kui niu xi najmi kik'inyaha xuta xi kis'e nú chá ján nk'ie, tunga nd'ǎi Espirituhu Ntíaná ja tsakúchjǐhi já postruhu ko já profetaha Ntíaná ⁶nk'ie nga xuta xi najmi ntje judio tǎhen ra ta ts'íinkjǎhǐn ni xi tsjáha Ntíaná ntǐhi ko ta kuichú ma nku yjonintehe Cristo ko ta sakú yaha ni xi kitsúya tǐtjun Ntíaná nga tsjáha xuta xi ts'e. Én nda tsuhu Cristo xi b'a ts'íun.

⁷Ntíaná tu kitsjáhana nga k'uenijmía én nda tsu xu'bi. Kjuandaha Ntíaná xi b'a kits'íun. Kitsjána xi nkú ts'ín tǎhen ra nga'yún chánkaha. ⁸An xi 'yún ichi sa ǎjihǐn ngayjee xuta xi ts'e Ntíaná, tunga kik'ǎihína kjuandaha nga tǐb'enijmíhi xuta xi najmi ntje judio tǎhen ra kjuanchínaha Cristo xi ndaha nku najmi ch'a mankjinyeje. ⁹Tǐb'ejǎ chja xi nkú ts'ín tǐbitjusun ni xi y'éjǎ 'ma Ntíaná nǐstjin nk'ie, kui xi kits'ínnda ngayjee ni xi tǐjǐn. ¹⁰B'a ts'ín xuta ninku tǐb'ejǎ chji nd'ǎi xi nkú tǐjǐn kjuankjink'uhun Ntíaná, kjuankjink'un xi kj'ǎi kj'ǎi ts'ín yaha. Kui ni xu'bi tǐs'ejǎ chji nginkun xi tǐhǐn xá ko xi tǐhǐn nga'yún nk'a ján.

¹¹Kui niu xi y'énda tǐtjun Ntíaná nkúhu nǐstjin nk'ie ko Nda Ntíaná Jesucristo ja kits'íntjusun niu nd'ǎi. ¹²At'aha nkuhú makaá Cristo ko at'aha s'ejinná én nda tsuhu, kui nga tsuhu ra tak'aán ko najmi binkjaán nga bichúk'un tǐnahaá Ntíaná. ¹³Kui b'a maha tǐbankihínuu nga najmi tu n'ekjehe ruu tak'un ngat'aha nga un tǐbena ngandanuu. Ngat'aha nga un tǐbena, Ntíaná tǐts'ín nga tǐs'ejǎ chjinuu kjuachánkaha.

B'ǐ ts'ín kitsúya Pablo xi nkú ts'ín bankintjái xuta ninku Efeso

¹⁴Kui kjuaha báasinkúnch'ihinna nginkun Ntía Nǎ'miná. ¹⁵Kui xi b'éjǎ nga s'e nga nkúnkú ntje xi tǐjǐn ndjiojmi ján ko asuntee. ¹⁶Bankihǐ nga Espirituhu Ntíaná katsjá nga'yúnkohonuu xi nkú ts'ín tǐjǎ kjuachánka tsjo tǐhǐn tu xi s'ehe ra nga'yún animanuu, ¹⁷ko nga

Cristo kat'ejñajin animanuu tu ngat'aha nga s'ejinnuu. Katji nanka kjamanuu ajihin kjuatjoo ko ndjá tinchajiun, ¹⁸tu xi b'a ts'ín jun ko ngayjee xuta xi ts'e Ntíaná kama kamankjihinnuu xi nkú ts'ín tayá ko ndju ko nanka ko nk'a kjuatjoho Cristo. ¹⁹Mjena nga choo kjuatjoho Cristo tu xi b'a ts'ín katsejín kikjihinnuu Ntíaná, ndaha tsa 'yún chánka sa kjuatjoho nga ni xi mankjinná.

²⁰Kan'etsjoho Ntíaná, kui xi ts'ati ni xi maha ts'ín nga xi nkúhu ni xi binchihí ko tsa xi nkú ts'ín títsu animaná nga kama. B'a ma xi nkú ts'ín tíña nga'yún xi ts'e xi títs'ínxájjinná. ²¹Kats'ínkjáihjin Ntíaná kjuachánka ajihin xuta ninku xi ts'e Cristo Jesu. Tehente b'a katuma ko santaha tu nk'éhé ni. Johon, b'a katuma.

B'í ts'ín tsakúya Pabló nk'ie nga nkuhú tinchajián Cristo

4 Kui b'a maha tǐbankihinnuu an xi kjíya'yán ngat'aha Ndá Ntíaná. Kixi tankínkoo yjonuu xi nkú ts'ín tjíhin nga ts'ín xuta xi Ntíaná j'ájihjin. At'aha Ntíaná j'ájinnuu. ²Nimakjua n'esjo yjonuu ko nda kas'eya animanuu. Kas'enuu kjuatsenta ko b'í ngján n'e'yún tak'un xinkiu. B'a n'oo tu ngat'aha kjuatjo xi tíñajinnuu. ³Tjen nga'yúhujun yjonuu nga nkuhú katumako tehento xinkiu xi nkú ts'ín tsjáníyánuu Espirituhu Ntíaná ko xi nkú ts'ín nkuhú ts'ín manuu kjuajyuu.

⁴Nkuhú maha yjonintehe Cristo ko nkuhú maha Espirituhu Ntíaná xi tíña. B'a ta ts'ín nkuhú j'ájinnuu Ntíaná, kui nga nkuhú ni xi tichuyóhoo. ⁵Nkuhú maha Ndá Ntía xi tíña. Nkuhú ni xi s'ejinná ko nkuhú Ndá Ntíaná n'ekjas'eheén xuta nga batentáha. ⁶Nkuhú maha Ntíaná xi Na'miná ngatenteé, kui xi batéxumaha, ts'ínchjén ko tíñajihjin ngayjee ni xi tjín.

⁷Tunga kin'ekjáihín raá kjuanda nga nkúnkáá. Xi nkú ts'ín kits'índzjoná Cristo, b'a ts'ín kisakúná. ⁸Kui nga b'í ts'ín tjít'aha éhen Ntíaná:

Ngjinji nk'a ján nga ngjiko xi jakj'á,
ko tu kitsjáhá ra xuta ni xi nda.

⁹¿Nkú tsuhu ra nga ngjinji? Kui xi tsuhu ra nga tjun ngjijen má nankaha t'anankiu. ¹⁰Ko xi ngjijeén, kui xi ta ngjinji má 'yún nk'aha nk'a ján tu xi ts'íntjusuhun ngayjee ni xi tsichuba.

¹¹Ko kui kikjin xi kitsjá nga tjín xi kama já postru, ko nga tjín xi kama já profeta, ko nga tjín xi k'uénijmí én nda tsuhu Ntíaná, ko nga tjín xi kama já bastuu ko já maestrú. ¹²Kui kjuandoo kik'aihi jóo tu xi kuakúyaha ra xuta xi ts'e Ntíaná xi nkú ts'ín kuasínko xinkjín ko tu xi b'a ts'ín sakú nga'yúhujun ra xuta ninku, kui xi yjonintehe Cristo. ¹³B'a ts'ín nkuhú s'ejihinná ko nkuhú chaá yáha Ntíhi Ntíaná. Yohó ni ma kuichú má xi tjíhin nga kuichú má ko s'eyaná xi nkúhu kui.

¹⁴Nk'ie nga b'a kamo, najmi s'eyaná xi nkúhu jántí xǐ xi kjit'a kjit'a kǐ'áí ts'ín s'eyaha kǒ najmi k'uáíntee tsa tu mí ni tsetsehé xi sakúyaná, tsa kui niu xi kjé'yúnná nga mjehe k'uanachaná. At'aha kui niu xi ts'ínchjén já mañá xi ni tsank'á bakúya. ¹⁵Tu sa ní én xi naxu chubáá at'aha tjoná xǐnkǐá. B'a ts'ín sájihinná Cristo, kui xi nintaku xuta nǐnku. ¹⁶Cristo ts'ín nga ngayjee yjonintee nkuhú bichú mako xǐnkjǐn kǒ b'a'yún sisihǐn xǐnkjǐn ngatentee ni xi tjǐhǐn yjonintee. Tsa ngatentee yjonintee ts'ínxá sisin, ngayjee yjonintee sá sisin kǒ sakú nga'yúhǐn nga bǐnchajǐn kjuatjo.

B'ǐ ts'ín tsakúya Pablo xi nkú ts'ín tjǐhǐn nga kuǐntsubáá ngǐnkǐn Ntǐaná

¹⁷Kui nga b'a xǐhǐnnuu kǒ ngajoho Ndá Ntǐaná b'a xǐhǐnuu ma. Najmi b'a tá n'e bǐntsubá sahanu xi nkú ts'ín tjǐntu xuta xi tjǐn asuntee, xuta xi ni tiya ts'ínnkjǐnk'un. ¹⁸Kui xi ja kis'ejyún kjuankjǐntak'uhǐn kǒ najmi tjǐntu tǐk'un xi nkú ts'ín ts'ínk'ǐéntu tǐk'un Ntǐaná xuta xi ts'e. At'aha ja kits'ín ndjá animaha kǒ najmi tá mankjǐhǐn rá ni xi ts'e Ntǐaná. ¹⁹Ja najmi tá tjǐhǐn rá kjuasuba kǒ ja kits'ínkjas'ehen yjoho ni ch'onk'uun. Najmi tá b'éch'oho rá yjoho nga ts'ín ngayje tǐkjá ni xi chuntǐ ngǐnkǐn Ntǐaná.

²⁰Jun bi najmi b'a tsu éhen Cristo xi tsakuyáihǐ tsa b'a noo. ²¹At'aha ja kinu'yó éhen Cristo kǒ tsinchiyó ni xi ts'e, kǒ yo nga Jesu tǐjǐnjǐhǐn ni xi naxu tjǐn. ²²Najmi b'a tá ts'ín bǐntsubáhanu xi nkúhu nk'ie. N'ek'óntjaiyo animanuu. At'aha ni xi kama mjenuu nk'ie ts'anachaha kǒ kits'ínkatsúhǐn. ²³Tjǐhǐn nga n'e tsetse ngáhanu animanuu kǒ kjuankjǐntak'unnuu. ²⁴N'e tsetsoo yjonuu, at'aha Ntǐaná kits'ínnda tsetse ngáha animanuu. Xi nkú ts'ín tjǐyaha nga kǐxǐ kǒ je, b'a kits'ínk'ǐé.

²⁵Kui b'a maha, najmi tá ch'anachaha ruu xǐnkǐu. Najmi tu én tsank'á chubo, at'aha nkuhú yjoninte mahaná ngatentee.

²⁶Nk'ie nga tǐma kjannuu, najmi tu ngatitsun n'o. Najmi tu bǐntsubá kjon nku nǐstjǐn tanto. ²⁷Najmi tu 'báíntohoo ndanindoo.

²⁸Xi ndyjé ts'ín nk'ie, najmi b'a tá kats'ǐhǐn. Kats'ínxá ní kǒ kats'ínchjén ntsja nga kats'ín ni xi nda, tu xi b'a ts'ín kama kuasǐnkoho xuta xi machjéhen rá tsa mí nihi.

²⁹Ndaha nku én ch'on tsu najmi tu kuǐtju tsu'bo. Én xi nda ní chubo, én xi tsjá nga'yúhǐn xuta, tu xi nda kamat'aihǐn xuta xi kuǐnt'é énnuu. ³⁰Najmi tu ni xi ts'ǐn'uhǐn Espirituhu Ntǐaná n'o. At'aha kui xi kik'áinuu tu xi chaha nga jun xi xuta xi ts'e Ntǐaná nk'ie nga kuǐchú nǐstjǐn nga kuǐtjusun nga kama ndáí kǐkjǐnnuu.

³¹Tǐch'onsjoo ngayjee ni ch'onk'un xi tjǐntujǐn animanuu, kjuakjoo kǒ kjuastintoo. Najmi tu ch'ǐya kjon, kǒ najmi tu ch'on 'mihǐu xǐnkǐu, kǒ najmi tu ngat'aha tu mí nihǐ ni n'e uncho xǐnkǐu.

³²Nda ní chasohó xinkiu kó chasenimohó xinkiu. N'e ndyjat'ohó xinkiu xi nkú ts'ín kisakújinnuu kjuan'endyjat'a ajihin Cristo.

B'i ts'ín tsakúya Pablo nk'ie nga ñá xi ntíhi Ntíaná

5 Ntí tjohó Ntíaná jun, kui nga b'a tǎ n'ehenu xi nkú ts'ín Ntíaná. ²Xi nkú ts'ín y'eñajin kjuatjo Cristo nga kits'íntjoná, b'a ts'ín tǐntsubajiuun kjuatjo. Kui xi kitsjá yjohó nga k'ienntjálhiná. Kui xi kama nku chje sinje xi kin'ekjas'ehen Ntíaná.

³Ja kikj'áts'enuu Ntíaná. Kui nga tǎ santaha najmi tjíhin nga chubanímíyahanu xi nkú ts'ín chubǎ fantukohó xinkjín xuta xi tjín, kó tsa tu mí nihí ni xi chuntí nginkun Ntíaná, kó tsa kjúásihuun ni xi tjíhin xuta xingisoo. ⁴Kó najmi tu chubo én xi najmi nda tsu, kó tsa én ton ch'on tsu, kó tsa nku én xi najmi nda fane, at'ahǎ najmi chumi ni chjǐhi rǎ ni xu'bo. Tu sa ní én xi tsjáha máb'achjǐhi Ntíaná chubo. ⁵At'ahǎ ja yo nga xi chubǎ fantukohó xinkjín, kó xi ts'ín ni xi chuntí nginkun Ntíaná, kó xi fásihin ni xi tjíhin xuta xingisoo, kui xi najmi tsuhu rǎ nga Cristo kó Ntíaná kuatéxumaha. Xi tífásihin ni xi tjíhin xuta xingisoo, kui xi kj'ái ntǎ tjennki.

⁶Najmi tu 'bainto tsa tjín xi k'uanachakonuu nku én tiya, at'ahǎ ngat'ahǎ ni xu'bi kjuakjahan Ntíaná nibánehe rǎ xuta xi najmi nt'é'éhen. ⁷Kui nga najmi tu jun n'engujihin ruu yjonuu xuta xi b'a tǐncha ts'ín.

⁸At'ahǎ nǐstjin nk'ie má jyuun tintsuboo, tunga nd'ai ja má ndzjeen tintsuboo nga nkuhú makoo Nda Ntíaná. Kui nga tǐntsubahanu xi nkú ts'ín tjíhin nga k'úéentu xi tjǐntu má ndzjeen. ⁹N'oo ni xi nda kó naxu kó kixi, at'ahǎ kui niu xi bakúchji nga má ndzjeen tjeheenná. ¹⁰Tǐnchísjo má nihi xi sasíhin Ntíaná. ¹¹Ndahachí najmi tu n'o ni xi najmi chumi ni chjǐhi rǎ, ni xi ts'ín xuta xi ts'e má jyuun. Tu sa ní t'eñachiu nga najmi nda niu.

¹²At'ahǎ tu ñáhǎ xí subahǎ maná nga n'ekjǎá ni xi ts'ín'ma xuta xu'bo. ¹³Tunga ma chjǐhi ngayjee ni xi tjín nk'ie nga s'entuchjǐ má ndzjeen, ¹⁴at'ahǎ nd'íu b'éjña chji tu mí nihí ni. Kui nga b'a ts'ín tjít'a:

N'ekj'áíhi yjohi, ji xi kisufei.

Tísíntjein ajihin xutak'ien.

Tsa b'a n'eí, Cristo ts'íin ndzjehin.

¹⁵Kui b'a maha, nda nda chasenu xi nkú n'e kuíntsuboo. Najmi tu ni xi ts'ín xuta stjén n'o. N'e nínú xi nkú ts'ín xuta nkjink'un.

¹⁶N'oo ni xi nda tu mí chubáhǎ ni nga sakúntenuu nga b'a n'oo, at'ahǎ ch'on chun nǐstjin xi kich'aá nd'ai. ¹⁷Kui nga najmi tu nchini n'esjehenu yjonuu. Katumankjin nínuu mí nihi xi mjehe Nda Ntíaná nga n'oo.

¹⁸Najmi tu n'e ch'iu, at'ahǎ kui niu xi ts'ín nga n'eé tu mí nihí ni. Tu sa ní Espirituhu Ntíaná katsejǐhinuu. ¹⁹Salmo kó sohon ninku

chubanijmíyakohonu xinkju kō só xi nkú ts'ín kuakúyanuu Espirituhu Ntíaná. Ngayjehe animanuu só kō n'etsjohoo Nda Ntíaná. ²⁰Tu mí kjuahá ni tehente tjohoon máb'achjǎhi Ntia Nq'miná. B'a n'oo at'aha Nda Ntíaná Jesucristo ts'enuu.

**B'i ts'ín tsakúya Pablo xi nkú ts'ín
k'úéntuko xinkjún xuta**

²¹Chankjún xinkju at'aha Cristo týankjún. ²²Jun xi tí'minuu chjuún, chankjún x'innuu. B'a n'oo xi nkú ts'ín týankjún Nda Ntíaná. ²³At'aha xi tí'mi x'in, kui xi sǎña títjuhun chjuúhun xi nkú ta ts'ín Cristo sǎña títjuhun xuta ninku. Xuta ninku kui xi yjonintehe Cristo, kō Cristo kui xi kits'ínk'ankihǎ. ²⁴Xi nkú ts'ín xuta ninku benkjún Cristo, b'a ta ts'ín xi tí'mi chjuún tu nkjéhé ni katenkjún x'ihǎ.

²⁵Kō jun xi tí'minuu x'in, n'etjō chjuúnnuu xi nkú ts'ín Cristo kits'íntjo xuta ninku kō kitsjá yjohō ngandaha. ²⁶B'a kits'ín tu xi kikj'áts'ehe. Ehen kits'ín jekoho kō ntánijua tsanéjukoho ²⁷tu xi ja tjhǎn ra kjuachánka xuta ninku nk'ie nga kuichú nginkun. Najmi s'ehe ni chuntí, najmi ch'on k'úé, kō najmi s'ehe tsa mí nihi. Mje níhi Cristo nga je kō nga nda kikjin kama xuta ninku.

²⁸B'a ta ts'ín xi tí'mi x'in tjǎhǎn nga ts'íntjo chjuúhun. Kats'íntjo xi nkú ts'ín tjohō yjonintehe. Xi tjohō chjuúhun, kui xi tjohō yjohō. ²⁹At'aha najmi tjǎn xi unkie yjonintehe. Tsjá níhi nichine kō kuhun xi nkú nga ts'íhǎn Cristo xuta ninku. ³⁰At'aha ta yjonintehe Cristo tintsujǎn.

³¹B'i ts'ín tjít'a: “Kui nga nku nda k'uéjǎnaha xi cháha nga k'uéjǎnako chjuúhun kō nkuhú yjoninte kuichú ma nga joo.” ³²Yún nanka ni xu'bi, tunga nk'iehé nga nchjanijmíya Cristo kō xuta ninku ts'inchjén niu. ³³Jun tjǎhǎn nga n'etjō chjuúnnuu xi nkú ts'ín tjonuu yjonuu. Kō xi tí'mi chjuún katenkjún x'ihǎ.

6 Kō jun xi tí'minuu ntí, tinú'yá'óhōon xi chánuu at'aha Nda Ntíaná s'ejinnuu. At'aha kui niu xi nda tjǎn nginkun Ntíaná. ²Ajihǎn kjuatéxuma xi kin'ekjas'ehe Moise kui kjuatéxuma xu'bi xi tjun títsuya ni xi Ntíaná tsjáha xi kuínt'éléhen. B'a títso: “Chankjún nq'mihǎ kō naahi ³tu xi nda kamat'aihinni kō tse nistjin kamaha ri nga kuínchin asuntee.”

⁴Kō jun xi tí'minuu nq'mi, najmi tu chuba kjan n'ekoo ntfnuu. Tu sa ní tjen niyóhōo nga n'echó kō takúyohōo ni xi ts'e Ntíaná.

⁵Kō jun xi tí'minuu xuta musu xi kich'atse, tinú'yá'óhōon xi já ntíanuu ei asuntei. Chankjún kō tǎnkjún kō ngayjehe animanuu tinú'yá'óhōon, xi nkú joyaha tsa Cristo tinú'yá'óhōon. ⁶Najmi tu nku nk'ie nga tǎbasenuu nga b'a n'oo, tsa tu xi b'a ts'ín nda skuehenuu. N'e nínú xi nkúhu xuta musu xi Cristo ts'atse. Ngayjehe animanuu n'oo ni xi mjehe Ntíaná. ⁷Nk'ie nga tǎn'o nku xá, ngayjehe k'un b'a

noo. B'a noo xi nkúhu tsa nku xáha Nda Ntĩaná tĩn'ò. ⁸At'aha yo nga Ntĩaná tsj ngajoya ngáha ra ni xi nda kits'ín nga nkúnkú xuta, ndaha tsa musu xi kich'atse ko ndaha tsa xi ndaĩhi yjoho.

⁹Jun xi tí'minuu já ntia, b'a ta n'oo xi nkú nga tíxihĩn xuta musu. Najmi tu binchankjúhuun. Ja yo nga nkuhú maha Nda Ntĩanuu xi tĩña ndjiojmi ján ko nga kui xi najmi ngabi ts'ín ajihiĩn xuta.

**B'ĩ ts'ín tsakúya Pabło xi nkú ts'ín k'úéndaá yjoná
tu xi najmi ts'ín nganahana ndanindoo**

¹⁰Ni xi fekuhu xi xinnuu, kasakúnuu nga'yún ajihiĩn nga'yún chánkaha Nda Ntĩaná. ¹¹Xi nkú joyaha já jun xi b'énda yjoho nga kján, b'a ts'ín n'ech'okohonu yjonuu ni xi tsjáná Ntĩaná, tu xi ndjá kama kuĩnchahanu nga kuankín kontroho kjuamañaha ndanindoo.

¹²At'aha najmi xuta asunnte tĩbixkjankaá. Xi tĩn níhi nga'yún tĩbixkjankaá, xi nk'a xáha, xi batéxuma asunnte ngatitsun xu'bi. Kui xi jáninda ch'onk'un nkjún xi tĩn nk'a ján. ¹³Kui nga t'endahanu yjonuu xi nkú joyaha já jun xi Ntĩaná kitsjáyjehe ni xi ts'ínch'okoho ra yjoho, tu xi kuichúkjuahanuu nk'ie nga kuichú nĩstjin xi ndjá nĩba. Ko nga ja tĩnda sisinnuu yjonuu, ndjá tĩncho.

¹⁴Kui b'a maha, ndjá tĩnchahanu. Ni xi y'éña Ntĩaná ko ni xi naxu nginkun, kui xi n'ech'okohonu yjonuu xi nkúhu já jun xi ts'ínch'oho yjoho. ¹⁵T'endo yjonuu nga t'enijmíu én nda tsu xi tsuya kjuajyuhu Ntĩaná. ¹⁶Machjéhen nga n'e s'ejun Ntĩaná, tu xi najmi tĩn xi nkú ts'ín ts'ín'uhunnuu ndanindoo. ¹⁷T'ejin tak'un nga Ntĩaná kits'ínk'ankinuu. Chjúbó éhen, kui xi kitsjánuu Espirituhu Ntĩaná tu xi kuĩsĩnkohonu yjonuu.

¹⁸Tehente chubakoo Ntĩaná xi nkú ts'ín tsjániyánuu Espirituhu. Chubakoo ko tĩnchĩhuu ni xi machjénnuu. Tĩntsuba ndo ko najmi tu n'ekjioho tak'un nga chubantjo ngayjee xuta xi ts'e Ntĩaná.

¹⁹Ko ta chubantjainú nk'ie nga chubakoo Ntĩaná, tu xi tsjáhana én xi kuĩnchja, tu xi ndjá kuĩnchjahanu nga k'uenijmía ni xi kis'ejña 'ma nĩstjin nk'ie, xi ja tĩb'éña chji én nda tsuhu Ntĩaná nd'ai. ²⁰Kui ngat'aha éen kjíya'yúhunna an xi tsú'ba ngajoho Nda Ntĩaná. Chubantjainú nginkun Ntĩaná tu xi kuĩnchjahanu xi nkú ts'ín tĩhĩn nga kuĩnchja ko tu xi najmi tsankjuhunna.

B'ĩ ts'ín kits'ínkje Pabło xujun

²¹Ngatentee ni xi tímat'an ko ni xi títs'ian kuĩtsuyanuu Tikiko, nda nts'eé xi tjona ko xi kixi títs'ínxát'aha Nda Ntĩaná. ²²Kui kjuaha títs'ínkjísehenuu tu xi chahanu nkú ts'ín tĩntsubai ko tu xi tsjá nga'yúhun ra anĩmanuu.

²³Ntia Na'miná ko Nda Ntĩaná Jesucristo katsjáha já nts'eé kjuajyu ko kjuatjo, ko kat'éyaha nga 'yún s'ejihĩn. ²⁴Kjuandaha

Ntíaná kas'ehe ngatentee xi tjohe Ndá Ntíaná Jesucristo, kjuatjo xi najmi mahá feya.